

Mid-Day Dogri News

31st October 2024

समे — 12:25

J&K Vigilance Week

जम्मू कश्मीर सरकार अज्जै थमां सर्तकता जागरूकता हफ्ता मना करदी ऐ जेहदी शुरूआत अज्ज मुखमन्त्री उमर अब्दुल्ला हुंदे आस्सेआ औपचारिक तौरा पर सगंध चुक्कने कन्नै होई। सिविल सचिवालय श्रीनगर च मीटिंग हाल च लग्गे दे इक कार्यक्रम दरान सब्बने प्रशासनिक सचिवें बी उंदे कन्नै सगंध चुक्की जिसलै जे दौनें डिवीजनल कमीशनर ते सब्बने जिलें दे विकास कमीशनर वर्चुअल ढंगै नै इस मुहीम च शामिल होए। बक्ख-बक्ख मैह्कमे गी अपनी सतह पर सर्तकता जागरूकता हफ्ते तैह्त् अपने कम्मं प्रति निष्ठा इमानदारी ते अपने अधिकारें ते कर्तव्ये लेई सर्तक जागरूक रौहने दी सगंध चुक्का करदे न। इस ध्याड़े गी मनाने दा मकसद सरकार, प्रशासन ते समाज गी भ्रष्टाचार मुक्त, साफ सुथरा, पारदर्शी ते जवाबदेह बनाना ऐ।

<><><><><><>

Akhnoor Attack

जम्मू जिले दे अखनूर सेक्टर च किश बेपंछानू आतंकवादिणं इक फौजी गड्डी गी नशाना बनांदे होई केई रौंद गोलियां चलाइयां। आकाशवाणी दे जम्मू संवाददाता नै जानकारी दित्ती ऐ जे सेक्टर दे बट्टल इलाके च सुरक्षा बलें घेरा पाइयै बड्डे पैमाने पर तुपाई अभियान शुरू कीते दा ऐ। खौड़ ब्लाक दे बट्टल इलाके च भारी थेआरें कन्नै लैस आतंकवादिणं दे मजुद होने दी सूह ऐ। जानकारी मूजब आतंकवादिणं ग्रां च लग्गा'रदी फौजी अम्बुलेंस पर गोलियां चलाइयां जेह्दे बाद इलाके गी घेरियै तुपाई अभियान चलाया जा'रदा ऐ तां जे आतंकवादिणं गी ठकाने लाया जाई सकै, जेह्दे च मन्नेआ जा'रदा ऐ जे बन्ना टप्पियै आए दे होने न।

<><><><><><>

LG-Education

उपराज्यपाल मनोज सिन्हा होरें नौजवानें गी जीवन च नमां लक्ष्ये तय करने च गतिशील, मुकाबले आह्ला माहौल ते ज्ञान दे मंच दा लाह ठोआने दा आह्वान कीता। श्री सिन्हा होरें आखेआ जे इस महान राष्ट्र दे नौजवानें गी विकसित भारत 2047 दे विजन गी सच करने च योगदान देना लोड़चदा ऐ। ओह कल शोरे कश्मीर कृषि विज्ञान टैक्नोलाजी यूनिवर्सिटी स्कास्ट कश्मीर च अमर उजाला समूह आस्सेआ आयोजित मेधावी छात्र सम्मान समारोह गी संबोधित करा करदे न। तोआई, एल.जी मनोज सिन्हा होरें राजभवन च राष्ट्री एकता दिवस, रन फॉर फन एकता कार्यक्रम ते जम्मू-कश्मीर केंद्र शातिस प्रदेश स्थापना दिवस दे सरबंघै च कीता जा'रदियें तैयारियें दी समीक्षा आस्तै इक्क बैठक दी प्रधानता कीती। श्री सिन्हा होरें इनें कार्यक्रमें गी अमन-रमानदारी ते सुचारू ढंगै सिर मनाने आस्तै सब्बे लोड़चदे प्रबंध यकीनी बनाने दे निर्देश जारी कीते।

<><><><><><>

Jammu Smart City

जम्मू स्मार्ट सिटी परियोजनाएं दे हिस्से दे तौरा पर जम्मू शैहरे दी ई-आटो ते ई-रिक्शा चलाने आले पैहल गी 17में अर्बन मोबिलिटी इंडिया अवार्ड समारोह च शेहरी ट्रांसपोर्ट दे क्षेत्र च उत्कृष्टता लेई पुरस्कार हाल होआ ऐ। गुजरात दे गांधी नगर च लोआए गेदे इस समारोह च तम्मू स्मार्ट सिटी प्रोजेक्ट दे मुख् कार्जकारी अधिकारी डॉ. देवांश यादव ते उंदी टीम गी “बेह्तरन नवाचार माली बवस्था आले” दा सम्मान दित्ता गेआ। इस पैहल तैह्त्त जम्मू च माली तौरा पर कमजोर 800 परोआरें गी इस पैहल कन्नै फायदा पुज्जा ऐ। देवांश यादव होरें दस्सेआ जे ई-ओटो लेई 74 ज्हार ते ई-रिक्शा लेई 58 ज्हार रपे दी सब्सिडी उपलब्ध कराई जा’रदी ऐ।

<><><><><><>

Army-Chai Pe Charcha

भारतीय फौज आस्सेआ राजौरी जिले दे सरसोती इलाके च उत्थूं दे सरकारी हाई स्कूल च इक कामयाब “चाय पे चर्चा” दा सरिस्ता कीता। इस पैहल दा मकसद मकामी ग्रामीण लोकें कन्नै वाकफी ते तालमेल बधाना, महत्वपूर्ण विषयें पर उंदे नै गल्ल करना ते फौज ते आम जनता बश्कार सरबंघें गी होर नेड़मा ते मजबूत बनाना हा। इस दरान जिनें प्रमुख विषयें पर गल्लबात होई, उंदे च ग्रां दिएं जरूरतें ते विकास, समुदायिक विकास, इलाके दा समाजी आर्थिक विकास, मकामी प्रशासन बगैरा शामिल हे। एह्दे इलावा ढांचागत विकास, सेह्त्त सेवाएं, शिखा, मानसिक स्वास्थ्य ते टिहाऊ समुदायिक विकास सरबंघी कम्में कारवाइएं समस्याएं दे नबेड़े दे बारे च बी चर्चा कीती गई।

<><><><><><>

Army-Medical Petrol

राजौरी ते पुंछ जिले दे सनाड, सिआल सुई ते गखरोरे इलाके च फौज दे डाक्टरें च इनें दूर दरेड़े इलाके च गश्त करियै उत्थें रौहने आले गुज्जर ते बक्करवाल समुदायें दे लोकें गी जरूरी सेह्त्त सेवा उपलब्ध कराइयां। इस दरान लोकें कन्नै गल्लबात कीमी गई, उंदी सेह्त्त बारे पुच्छेआ गेआ, उंदी डाक्टरी जांच कीती गई ते उनेंगी दोआइयां बी उपलब्ध कराइयां गेइयां। एह् इलाके की जे मते दूर दरेड़े न, इस करियै लोकें गी सेह्त्त ते इलाज गी लेइयै दिक्कतें दा सामना करना पौंदा ऐ इस करियै फौज नै उंदे तगर पुज्जियै उंदे सेह्त्त दिक्खमाल गी जकीनी बनाने लेई एह् गैह् पुट्टी।

<><><><><><>

Army-Solar Lights

पुंछ जिले दे पीर टोपा इलाके च रौहने आले लोकें दे जीवन स्तरै गी उबड़ा चुक्कने दे मकसद कन्नै फौज दी राश्ट्रीय राइफलज नै उनेंगी सोलर लालटेनां भेंट कीतियां। इस पैहल दा मकसद इस दूर दरेड़े इलाकें दे लोकें गी न्हरे बाहर जाने च सखाल लेई लालाटेने दी सहूलत देना ऐ तां जे बेले कबेले न्हरे बाहर जाने च उनेंगी दिक्कत पेश नेई आवै ते उंदे जीवन स्तरै गी उबड़ा चुक्केआ जाई सकै। सोलर लालटेनां हासल करियै एह् लोक ना छड़े खुश न सगुआं एह्दे लेई फौज दा आभार बी प्रगट करा करदे न।

<><><><><><>